

東

華

錄

東華錄

順治十

臣王先謙敬編

臣周瀚蕃恭校

順治五年戊子春正月丁酉朔朝鮮來貢○壬寅諭大學士范文程剛林祁允格等文職衙門不可無領袖但不可如故明時專擅耳今將爾衙門品級特立改定章服如之爾三人可用珠頂玉帶以示優崇○丙午以湖南六府底定苗民就撫頒賜平南大將軍恭順王孔有德黃金二百五十兩懷順王耿仲明智順王尚可喜二百兩續順公沈志祥一百兩其有功將士各賞銀兩有差○丁未歸化城固倫第瓦胡土克圖丹津喇嘛額爾德尼寨桑等來貢○戊申遣學士額色黑等齎敕往諭朝鮮國王李倧敕曰向來奉使官員王禮敬太過今後筵宴拂椅席送杯箸儀節俱不必行止

對坐舉杯竟席而止又聞嘉山大定江安州清川江坡州臨津江
三處搭橋以渡人民勞苦今後悉行停止止豫備堅固船隻用心
濟渡其義州至王京夜行火把亦屬煩勞並停免向來使臣先宿
碧蹠次日方進王京今後亦不必往碧蹠止在宏濟住宿次日清
晨卽進王京所與使臣禮物皆出自民間誠恐擾費先已減免今
復慮仍煩百姓再行酌減定爲條例正使銀五百兩棉紬二百匹
布二百匹苧布六十匹豹皮十張大紙五十卷小紙一百卷水獺
皮三十張青狸皮十五張花席二十張鹿皮七張順刀二口小刀
十把被褥一副靴襪各一雙鞍馬一匹空馬一匹此外盡行停止
副使銀四百兩餘如正使一等人銀一百兩棉紬四十匹布一百
匹小紙八十卷被褥一副二等人銀六十兩棉紬二十六匹布八
十匹小紙八十張被褥一副三等人銀四十兩棉紬二十匹布五

十匹小紙六十卷被褥一副以上各款俱永爲定例○辛亥原任浙閩總督張存仁奏僞宜春王朱議衍自江西入據汀州山寨總兵官于永綬破其寨議衍就擒命誅之○癸丑免山西太原平陽潞安三府澤沁遼三州被蝗額賦○甲寅唐古特達賴喇嘛來貢○丁巳出譚泰於獄○癸亥定遠大將軍肅親王豪格率師還京遣內大臣多爾濟達爾漢諾顏往迎之○衍禧郡王羅洛宏與櫬自軍中還京命固山貝子屯齊鎮國公拜尹圖輔國公鞏阿岱等迎之輟朝二日

二月丁卯增理藩院漢院判一秩正六品知事一秩正八品○固山額真公戶部尙書英俄爾岱卒年五十三英俄爾岱滿洲人初理戶部軍務 太宗文皇帝擢爲本部尙書旋授固山額真仍管部務娶饒餘郡王女授多羅額駙奉職精勤任事敏斷人咸稱之

履貴不驕誠實和易部事無大小悉委任焉卒之夕攝政王聞訃
夜半馳至其家慟哭漏盡而返諸王大臣往弔者無不悲悼○戊
辰定遠大將軍肅親王豪格凱旋至京 上御太和殿宴勞之○
己巳以平定浙東福建廣東遣官祭告 福陵 昭陵○革山東
巡撫張儒秀職下刑部質訊以招撫賊目馬世威縱其劫掠不行
稽察也○順天巡按羅國士奏土賊陷慶雲知縣張必科死之賊
尋遁得旨著嚴加防勦毋致蔓延○甲戌改太常寺犧牲所正千
戶爲犧牲所牧副千戶爲犧牲所副○江南江西河南總督馬國
柱奏江西總兵金聲桓據南昌叛僞稱豫國公王德仁僞稱建武
侯餘將各稱僞職用僞隆武年號攻陷郡邑劫掠船艘聲言將浮
江東下窺伺江南請速發大兵以圖撲滅章下兵部○丁丑命梅
勒章京羅碧往勦霸州一路土寇○辛巳江南江西河南總督馬

國柱奏官兵恢復無爲州擒斬賊首王洪圖等並獲降賊州同李
敦沅得旨李敦沅著正法○原任浙閩總督張存仁奏官兵恢復

連城順昌將樂三縣先後擒斬僞侍郎趙士冕僞總兵黃鍾靈等

○癸未免山東濟南兗州萊州青州去年被水額賦○甲申湖川

總督羅繡錦奏官兵攻破徐家寨等賊巢擒斬逆渠邢志濂等○

辛卯以固倫公主下嫁巴林部塞卜騰○壬辰以呂逢春爲右僉

都御史巡撫山東由按察使司副使關內道遷李鑑爲右僉都御史巡撫甯夏

山宣大總督降補○偏沅巡撫線縉奏僞貴溪王朱常彪僞恢武伯向登

位句通苗賊結連張光璧等分兵二路寇沅州臣同護軍統領線

國安梅勒章京許爾顯等合兵進剿攻下永甯斬首三千餘級獲

常彪登位及僞將二十餘人俱伏法○吏部奏佐貳雜職等官例

由吏員充選今考定者俱經選用而懸缺尙多應令內外各衙門

將辦事吏員自順治元二兩年實厯至今者俱確查送部照例考補得旨允行仍諭嗣後吏員實厯五年卽與考取著爲令○甲午山東巡按金廷獻奏土賊犯東平知州李芝桂戰歿東兗道劉可徵擊卻之

三月戊戌以王一品爲吏部侍郎

由順天府府尹遷

○己亥貝子屯齊尙

善屯齊喀及公扎喀納富喇塔努賽等共訐告鄭親王濟爾哈朗罪狀於是令鄭親王及詞內牽連諸人齊集質訊貝子屯齊等云得燕京時鄭王自盛京發銀千兩令屯齊啟攝政王求夫役修其府第我會諫止及鄭王至燕京遣達岱博博爾岱莽加魯我云我令爾等往啟竟遺亡此語何人當用官夫修房何人不當修房耶我因見其援比失當故不行啟聞鄭王云發千金修房是實並無令其索求夫役及較量修房等語况賜銀修房我會向巴特瑪德

爾得赫藍拜言與其修暫居之房何如修久住之房是實至於遣達爾岱博博爾岱莽加則忘之矣訊莽加供云王令僧住攜千金來是實不曾遣我何敢妄證博博爾岱供云我一時記不在心日久忘矣訊達爾岱供云王使我同博博爾岱莽加往傳令屯齊啟奏何人房當修何人房不當修爾爲何不啟奏豈非爾等忘我之語是實訊巴特瑪供與達爾岱同又訐告鄭親王值衍禧王饒餘王貝子和託薨逝時皆不令和碩福金往會喪此非漠視所親而不念乎訊鄭王云和碩福金因病未往曾別遣福金去又訐告願爾瑪洪羅託係有罪之人而鄭王加以寵愛過於我等昵罪人而疏宗族是屬何心王云願爾瑪洪原在護衛之列遇出獵時令其穿號衣相隨與之馬騎是實至羅託以時行走不令常來來時止令坐於護衛之後有何寵愛過人之處屯齊等云願爾瑪洪羅託

乃有罪之人我等乃貝子公也儻非寵愛何故其房過於我等往視公努賽之房可證又貝子尙善云與我之房甚不堪曾與鄭親王言之王遂將所餘閒房與我而以我之房與其護衛至我往福建出兵後王以伊子避痘之房無厠遂將我房院隔斷爲厠訊鄭王云汝言房屋不堪遂將我房與爾而從前所與房院因用隔斷是實又訐告鄭王之子濟度娶妻時屯齊貝子屯齊喀貝子尙善貝子扎喀納公富喇塔公努賽公等妻俱上坐王子噶布喇之妻末坐鄭王怒訶責眾章京護衛等爾等諂貝子公等令我子婦末坐豈非侮我年老子幼耶我聞爾等常在彼處往來毀詆我今後儻聞其事我必殺一二人以爲戒自時厥後凡章京護衛等不但不來我等之家卽在王之府門亦無一人與我等親近者此嫩對白爾格夸代俄特惠莽加所共知也王云並無噶布喇妻爲何坐

於末不坐於上之語止言將未成立之子婦爲何坐於貝子公等妻之列是實至於禁其諂媚往來必殺一二人之語並無影響況凡行獵出兵時我之諸護衛伊等與馬者與馬與弓者與弓我並不曾禁阻訊嫩對供云未分家之子婦爲何不坐於福金之後否則令坐於貝子公等妻之列等語是實並無勿看情面往來之言訊白爾格供云分家之子則視其夫之等級坐未分家之子則視其父之等級坐爲何將我子婦坐於末爾等勿得看情面等語是實並無不許往來之言訊俄特惠供云將我未分家之子婦爲何令末坐曾向莽加白爾格言之又禁止貝子公等家往來之言是實訊夸代供云未分家之子婦爲何令坐於末令陪福金坐爾等豈非看貝子公等情面而令坐於末乎等語是實訊莽加供云王言晚育之子婦爲何令坐於末爾等常往貝子公等家每去春有

賞賜今後當往來有節等語俱實富喇塔詰云我因無房向王言之因將敦對所住之房與我我住一年後王何故將廳房拆去王云我原說將此廳房拆來蓋房與富喇塔住時已將拆廳之言告之後拆取是實扎喀納詰云我與貝勒勒克德渾出兵時王言爾心愛之物可自言之我言要鞍隨令俄特惠送鞍來云爾諸弟年幼全仗於爾王云要鞍時將鞍與他是實並無諸子年幼全仗於爾之言訊俄特惠供云與鞍是實並無別言又扎喀納尙善富喇塔訐云去年我三人率本旗章京護衛等與王行禮時尙善在左王子噶布喇在其上扎喀納在右王子濟度勒度在其上稍偏行禮畢尙善扎喀納富喇塔至門上坐時王令其三子至門上令本旗章京護衛等行禮扎喀納言若令與王子行禮則當在內令王令其子至門上蓋欲誘我等行禮耳我等可同眾與弟輩行禮乎

尙善答言如欲行禮爾等可自行之我決不行拂衣而起莽加言
貝子等不當去達爾岱言爾等且畱俟與王子行禮畢再與爾等
行禮尙善言爾等免行禮我病腹脹言畢我三人俱出王府而回
眾章京護衛等俱知之訊莽加供云拜年時貝子居中三子居左
公等居右行禮卽出並無與王子行禮之言至於謂公貝子爾等
到此我等卽行禮不當去之言是實王云諸子在內跪於旁我不
知有在外與諸子行禮之言富喇塔詰云我赴叔王宴時與傅勒
赫公二人同坐於我後者祁他奈吳把什達爾岱也祁他奈醉而
欲睡我言爾醉耶祁他奈遂摩拳相向達爾岱吳把什勸止之傅
勒赫公告於英王及相會時英王謂鄭王曰我聞爾之祁他奈與
富喇塔相抵王默然問祁他奈答言我醉不知問吳把什言富喇
塔曾向祁他奈云爾飲酒妄言時我甚恥之祁他奈答云我乃爾

父執也爾如何教誨我爾乃晚輩我當教誨爾並未相抵王云英
王曾言與否我忘之矣聞祁他奈醉與富喇塔帶怒相戲我問富
喇塔祁他奈於汝前作何狀伊言與我相戲耳屯齊詰云我欲娶
墨爾根侍衛李國翰之女與我子使莽加問王莽加久之始云我
聞王之子勒度阿格要娶若明知之而必欲往問則試問之王云
曾將李國翰之女啟奏以配我子我子叔也爾子姪也欲娶與我
子之言是實屯齊詰云欲將儀仗房拆取蓋房令我同德爾得赫
啟請因奉諭儀仗房且不能增修不當拆毀此房向爲肅王所請
亦不曾與乃止王云因伊等言有閒房我啟知是實屯齊又詰云
王之外房與其與家人住我等非子姪乎不當與我等住乎王云
我之住房無幾欲拆彼房蓋於此因時候不宜修蓋將一所房暫
與家人居住又許告國憂時圖爾格索尼圖賴錫翰鞏阿岱鰲拜

譚泰塔瞻八人往肅王家中言欲立肅王爲君以 上爲太子私相計議又圖賴索尼鞏阿岱錫翰譚泰鰲拜六人共立盟誓願生死一處肅王使何洛會揚善謂鄭王云兩旗大臣已定立我爲君尙須爾議鄭王云攝政王尙未知待與眾商之鄭王初不肯承旣而云使揚善哈甯噶是實何洛會亦云鄭王前言是實又許告

上遷都燕京時將原定後行之鑲藍旗令近 上立營同 上前行又將原定在後之正藍旗令在鑲白旗前行肅王廼罪廢庶人如何令其妻在輔政叔德豫親王和碩英親王之福金前行鄭王先言無之旣而云曾與諸大臣商議而行是實訊錫翰供云鄭王議欲近 上行是實訊國戚多爾濟供云不知其議曾見近 上立營行走是實訊鰲拜巴圖魯供云王並未商議自盛京至燕京並不知近 上立營行走之語於是會議鄭親王濟爾哈朗當兩

旗大臣謀立肅王爲君以 上爲太子及議時乃言我意亦如此
但攝政王尙未知待我與眾商之擅謀大事其罪一也 上遷都
燕京時以 上幼冲將原定後行之鑲藍旗近 上立營又同
上前行其罪一也正藍旗原定後行反令在鑲白旗前行又曲徇
罪廢之肅王令其妻在輔政叔德豫親王和碩英親王之福金前
行豈非向與肅王同謀心生憐憫顯令僭越乎其罪一也鄭王久
無爲國宣勞之處及定大業又無輔佐之功而乃援比君上謂何
人房當用官夫修何人房不當修言語不倫其罪一也寵愛有罪
之顧爾瑪洪羅託給與美宅反優於公努賽厚薄無等其罪一也
伊和碩福金託病不令會喪又往赴宴漠視所親其罪一也鄭王
應論死葬加博博爾岱明知鄭王有援比君上之言其同事之巴
特瑪達爾岱已實供而猶庇護不吐葬加博博爾岱均應論死祁

他奈醉後與公富喇塔口角應鞭一百嫩對明知鄭王因王子噶布喇之妻於宴時坐於公等妻之末責讓屬員其同時之白爾格俄特惠夸岱已實供而被猶庇護不吐應鞭一百公圖賴往肅王家私相計議欲立肅王爲君以上爲太子罪一又與譚泰鞏阿岱索尼錫翰驚拜等共立盟誓罪一索尼奏阿里馬之事旣回錫翰鞏阿岱譚泰驚拜四人至圖賴家謀執阿里馬以待圖賴言所謂執其手者期執其肘執其肘者期執其身非乎因搥土而揚之云與汝將去於時索尼言爾爲鍼我爲綫相依爲生可也及上遷都燕京原定鑲藍旗及鄭親王在後行而聽信鄭王任其在上前立營日間同上前行罪一又將正藍旗違令在鑲白旗前行又附和鄭王憐憫罪廢之肅王多方徇庇罪一圖賴應革去公爵籍沒家產驚拜巴圖魯同謀立肅王爲君以上爲太子罪一

又與鞏阿岱索尼錫翰譚泰圖賴等共立盟誓罪一索尼奏阿里馬事既回鰲拜與錫翰鞏阿岱譚泰往圖賴家謀執阿里馬以待聞圖賴索尼悖言欺隱不奏罪一上遷都燕京時聽信鄭王一任鑲藍旗正藍旗違令前行又曲徇罪廢之肅王明係與鄭王同謀而又言鄭王並未商議自盛京至燕京並不知其近上立營行走鰲拜應論死公塔瞻公錫翰私相計議謀立肅王又互相徇庇塔瞻應革去公爵錫翰亦革去公爵並革內大臣議政大臣職籍沒家產索尼謀立肅王爲君又與圖賴譚泰鞏阿岱錫翰鰲拜等相誓生死一處及聞圖賴悖言欺隱不奏又任憑原定在後之兩旗違令前行又顯庇罪廢之肅王索尼應論死國戚多爾濟附和鄭王令兩旗違令前行又顯庇罪廢之肅王而又言不知鄭王之議國戚多爾濟應革內大臣議政大臣任贖身公圖爾格曾向

肅王言欲立爾爲君又與索尼圖賴錫翰鞏阿岱鰲拜譚泰塔瞻同往肅王家私相計議圖爾格應革公爵並盡革所有職阿濟格尼堪當上遷都燕京時鄭王欲率本旗近上立營又欲將正藍旗在鑲白旗前行曾經與議欺隱不奏阿濟格尼堪應罰銀百兩議上得旨鄭王革去親王爵降爲多羅郡王罰銀五千兩奪巴特瑪之半箇牛朶達爾岱原在杜爾德牛朶下此全牛朶及族人孫塔之半箇牛朶莽加之全牛朶並奪出博博爾岱博博圖兄弟二人並撥出隸於別旗莽加盡革所有職贖身除其覺羅籍博博爾岱革職贖身嫩對鞭一百折贖祁他奈無罪免責鰲拜巴圖魯免死贖身公圖賴免革公爵及籍沒家產革其子輝塞所襲之職並奪其燕京所投漢人與因官所賞蒙古籍沒揚善羅碩家產時所得之物及幽禁肅王時嘉其言善所賞銀二百兩玲瓏鞍馬一

匹其兄弟子姪爲侍衛者俱革退塔瞻從寬免革公爵錫翰革去公爵仍爲阿思哈尼哈番並革其議政大臣贖身國戚多爾濟免革職贖身索尼免死盡革所有職贖身黜爲民徙居 昭陵奪其燕京所投漢人與因官所賞蒙古及幽禁肅王時嘉其言善所賞銀二百兩並玲瓏鞍馬一匹其兄弟子姪爲侍衛者俱革退圖爾格免革公爵革其子廓步梭所襲之職並奪其燕京所投漢人因官所賞蒙古阿濟格尼堪坐以應得之罪○辛丑幽繫肅親王豪格先是豪格出征四川已及二載地方未全平定地方官亦未有以投誠平定入奏者又擊敗流賊張獻忠遣學士蘇納海啟奏時有護軍統領哈甯噶於眾人會集處言曰若非護軍統領阿爾津蘇拜相助則我等皆失利矣希爾貝在後奪前進之阿爾津蘇拜功王將其冒功事竟未議結次日阿爾津蘇拜跪求議王亦未議

尙書譚拜請王又未議且將譚拜請議事云無之又欲將罪人揚善弟機賽補護軍統領啟奏於是諸王貝勒貝子大臣會議以肅親王將希爾良冒功事隱蔽舊念未除因揚善爲伊而死欲升其弟亂念不忘奉有以罪人揚善弟機賽爲護軍統領不合之旨宥王之罪至於三次戒飭猶不引咎諸王貝勒人人憤怒如此怙惡不悛仇抗不已不可復留豪格應擬死得旨如此處分誠爲不忍不准行諸王內大臣復屢奏言 太祖長子亦曾似此悖亂置於國法乃從眾議免肅親王死幽繫之奪其所屬人員幽繫後肅親王謂阿濟格尼堪蘇拜云將我釋放則已如不釋放毋謂我繫戀諸子也我將諸子必以石擲殺之○甲辰喀爾喀部俄木布額爾德尼等來貢○乙巳唐古忒達賴喇嘛厄魯特部顧實汗等來貢○丙午吏部奏江南河南秦楚浙閩等處票委官員赴部延遲貢

偽難憑請自今以後一概停止以杜頂替匿詐之弊從之○宣大

山西總督申朝紀卒○己酉以覺羅巴哈納爲戶部尙書由固山額真遷

調噶達渾爲吏部侍郎以車克爲戶部侍郎由理事官遷○庚戌命固

山額真譚泰爲征南大將軍同固山額真何洛會統領官兵討江

西反賊金聲桓○辛亥甘肅巡按許宏祚坐私餽貝子滿達海囊

駝帳房革職滿達海坐以應得之罪追餽物入官○戊午反賊金

聲桓遣謀遺書開歸總兵高第約期舉兵第執其使以聞○辛酉

以耿焞爲兵部右侍郎兼右僉都御史總督宣大山西由順天巡撫遷○

壬戌定優免則例在京官員一品免糧三十石人三十丁二品糧

二十四石人二十四丁三品糧二十石人二十丁四品糧十六石

人十六丁五品糧十四石人十四丁六品糧十二石人十二丁七

品糧十石人十丁八品糧八石人八丁九品糧六石人六丁在外

官員各減一半教官舉貢監生生員各免糧二石人二丁雜職省祭承差知印吏典各免糧一石人一丁以禮致仕者免十分之七閒住免一半犯賊革職者不在優免例如戶內丁糧不及數者止免實在之數丁多糧少者不許以丁准糧丁少糧多者不許以糧准丁俱以本官自己丁糧照數優免其分門各戶疏遠宗族不得一概溷免○癸亥定浙江官兵經制○陝西巡按劉明侯奏賊渠武大定收合餘燼窺犯甯羌界遊擊張德俊等大破之擒斬千百四十餘名獲婦女馬匹衣甲輜重無算

夏四月丁卯以楊國興爲右副都御史巡撫順天

由光祿寺卿遷

○戊辰

免陝西渭源金縣蘭州衛雹災額賦○辛未 上獵於近郊○定

殯殮發引安葬例○以達爾泰爲禮部侍郎○壬申定盛京守

太廟首領馬法秩視施喇哈番品級其餘七馬法俱視護軍校

品級○浙閩總督陳錦奏克復建甯擒斬僞鄖西王朱常湖僞國師王祁等○癸酉侍衛廓布梭訐告其祖母及父圖爾格叔遏必隆同叱辱遏必隆妻格格禁其往來於父及叔父家又 太宗賓天時圖爾格等與白旗諸王素有讐隙傳三牛象下護軍備甲冑弓矢護其門尤屬變亂廓步梭不願與叔遏必隆同居特行首告法司議遏必隆母子叱辱格格又不引服復設兵護門應俱論死籍沒家產護軍統領鰲拜巴圖魯公鞏阿岱錫翰偏聽圖爾格言擅發兵丁守門亦應俱論死護軍校吳祿喀鄂泰左袒其主應各鞭一百議上命免鰲拜鞏阿岱錫翰死遏必隆母子亦著免死仍下諸王貝勒大臣會勘諸王貝勒大臣等以遏必隆犯罪重大仍應論死其母免死籍沒鰲拜革職爲民得旨鰲拜免革職遏必隆免死革職籍沒其母子家產一半仍撥隸伊爾登牛象下奪其所

屬牛彖人丁吳祿格鄂泰各鞭一百廓布梭免許告祖母父叔之罪仍留侍衛任其所奪牛彖下人丁願歸何牛彖聽之○乙亥

上還宮○丙子贈殉難山東東平州知州李芝桂官廕○己卯封科爾沁國杜爾伯特鎮國公色冷爲貝子以其父阿督齊達爾漢舉國投誠功也○以降授三等輔國將軍宗室錫翰仍爲輔國公

○庚辰授吳喇忒部吳賁爲鎮國公以其父圖門舉國投誠功也

○命固山額真庫魯克達爾漢阿賴尙書宗室吳達海等駐防漢

中○辛巳以拜音達爲工部侍郎

山梅勒章京遷

○壬午平南大將軍基

順王孔有德奏大軍至辰州擒僞榮王朱有楨子朱松於苗洞又生擒僞奉國將軍朱運烜於興化土司隨破永甯巢擒僞貴溪王朱長標軍至廣西全州何騰蛟等聞風遁貴州銅仁府廣西全州興安縣關陽縣苗猺共三十一處洞二百六十處俱歸順擒獲僞

南威王朱寅衛並子朱載功僞長沙王朱由榔僞輔國將軍朱華等四十一人及諸僞伯總兵司道官員甚眾下所司察敘○丙戌命固山額真劉之源佟圖賴爲定南將軍駐防寶慶固山額真墨爾根侍衛李國翰爲定西將軍駐防漢中○丁亥命平西王吳三桂自錦州移鎮漢中○辛卯鳳陽巡撫陳之龍奏自金逆之叛沿海一帶與舟山之寇止隔一水故密差中軍各將稽察奸細擒到僞總督黃毓祺並家人袁五搜獲銅鑄僞關防一顆反詩一本供出江北富黨薛繼周等江南王覺生錢謙益許念元等見在密咨拏緝得旨黃毓祺著正法其江北窩賊薛繼周等江南逆賊王覺生錢謙益許念元等著馬國柱嚴飭該管官訪拏袁五著一併究擬○癸巳故明宗姓朱履祧訛言倡亂被獲伏誅

閏四月乙未朔湖川總督羅繡錦奏興國逆賊劉大刀與僞總督

鮑瑞玉合謀爲亂遊擊張國忠等分兵進剿陣斬瑞玉擒僞副將彭守軌推官錢居清同知錢應統等十人斬之並獲僞札關防馬匹器械○戊戌復郡王濟爾哈朗爵爲和碩鄭親王○命故衍禧郡王羅洛宏子羅可鐸襲爵○陝西總督孟喬芳奏涼州叛回結連蘭州回黨寇鞏昌遣副將趙光瑞擊之遊擊楊相等由鞏昌夾攻斬賊百餘副將馬甯等又衝殺七十餘里殺回賊三千餘眾悉潰○壬寅湖廣提督柯永盛奏僞總兵蕭相國僞都司徐雲從於蘄水糾眾倡亂于總鄂效鵬等進剿擒相國等○癸卯以席訥布庫博爾惠羅璽蘇拜沙爾虎達白爾赫俱爲議政大臣○以李國英爲右副都御史巡撫四川由署巡撫總兵官遷○命陝西設遼學教官一每科中舉人二名歲貢二名改永平府寓學爲遼學裁教官一留一員每科中舉人三名歲貢三名以平西王吳三桂移鎮陝西故

也○甲辰裁鑾儀衛官百十四員○丁未諭戶部今後一切債負每銀一兩止許月息三分不得多索及息上增息並不許放債與赴任之官及外官放債與民如違與者取者俱治重罪○禁止諸王府商人及旗下官員家人外省貿易○甲寅鑲紅旗滿洲固山額真葉臣卒○復湖廣鄉試舊額一百六名○陝西總督孟喬芳奏副將馬甯劉友元遊擊張勇破回賊於臨洮內官營斬獲甚眾○乙卯平西王吳三桂赴漢中戍守瀕行上御位育宮賜宴並賜蟒袍一襲涼帽一頂金黃帶一圍玲瓏撒袋一副弓矢全鞍馬二匹○江甯巡撫周伯達卒○己未以遲日益爲右副都御史巡撫湖廣由右布政使遷○庚申增護漕遊擊一中軍守備一千總二把總二兵一千名○癸亥命固山貝子屯齊爲平西大將軍同固山額真宗室韓岱率師討陝西叛回

五月乙丑朔日有食之○戊辰陝西總督孟喬芳奏官兵大破叛回於鞏昌臨洮蘭州等處城邑俱復○辛未陝西總督孟喬芳奏逆回擁立僞延長王朱識鏐煽惑人心遊擊張勇敢之於馬家坪識鏐就擒命斬之○贈死事湖廣荊南道副使劉開文參議甘文奎鄖陽知府董有聲襄陽知府楊鑛鄖陽同知劉璇張有芳鄖陽推官孫揚聲襄陽推官李實發鄖縣知縣趙丕承保康知縣薛溥竹山知縣童士勤襄陽知縣潘朝佑官廕鄖縣典史雷之縉官○降鳳陽巡撫陳之龍二級調用以巡按潘朝選劾其禦寇疏防縱兵搶掠也○乙亥以劉自竑爲湖廣布政使司參政管右布政使事由浙江管按察使事副使遷○辛巳厄魯特部顧實汗來貢○壬午復以輔國公錫翰爲議政大臣○以吳汝玠劉元弼爲禮部侍郎郭朝宗爲工部侍郎俱由梅勒章京遷劉仲金爲兵部侍郎馬如龍爲刑部侍郎

俱由理
事官遷

○以趙福星爲右副都御史巡撫鳳陽

由江南左
布政使遷

土國寶

爲右副都御史巡撫江南

由江南按
察使遷

○降安徽巡撫王愷三級調

外用以科臣魏象樞劾其徇庇受賄也○癸未以朱延慶爲右僉

都御史巡撫江西

由浙江嘉湖
道參政遷

王縉爲浙江按察使

由陝西西安
道參政遷

○甲申江南江西河南總督馬國柱奏官兵大破金逆復九江饒

州等府○遣喇嘛席喇布格隆等齎書存問達賴喇嘛並敦請之

又遺書存問班禪胡土克圖訥問汗俾勸達賴喇嘛來京各賜以

金鑲玉帶銀茶筭等物○丙戌陝西按察使劉允坐貪婪革職○

丁亥命浙江總督移駐衢州○戊子天津妖婦張氏假稱故明天

啟后同黨王禮張天保私製玉印令旗謀爲不軌被獲伏誅○朝

鮮來貢○己丑以劉宏遇爲右副都御史巡撫安徽

由陝西左
布政使遷

漢祚爲江南左布政使

由山西甯武兵
備道副使遷

夏一鶚爲江南按察使

由江

南渭運道副使遷

○壬辰贈死事陝西固原遊擊李變龍周存德馬應熊

魏尙忠守備趙文光董師吉官廕○贈鄖陽死事總兵官都督同知孫定遼遊擊李顯功行都司袁捷署總兵官楊文富署參將漆尙友官廕

六月甲午朔免陝西西安延安平涼臨洮慶陽漢中去年雹災額

賦○丙申敘征山西陝西山東湖廣四川江南及追殺流賊功將

士升授有差贈死事者官子弟襲職○以史儒綱爲陝西布政使

司參政管左布政使事

由浙江杭嘉湖道副使遷

○辛丑烏斯藏闡化王王舒

克等來貢○癸卯以周文棨爲右副都御史巡撫甘肅

由河南左布政使遷

○甲辰陝西總督孟喬芳奏侍郎額塞等大破逆回於蘭州餘黨

悉平○庚戌以董天機爲河南左布政使

由山西按察使遷

○乙卯贈死

事績溪縣知縣侯憲武官廕○丙辰京師地震○以張儒秀爲山

西布政使司參議管按察使事

降補山東巡撫

○癸亥

太廟成奉安

神位於正殿

東華錄

順治十一

臣王先謙敬編

臣周瀚蕃恭校

秋七月乙丑諭戶部嗣後宗室覺羅內貧乏不能聊生者不時奏聞○壬申開封河工成○丙子輔政德豫親王多鐸以黃紗衣一襲授平西王吳三桂子應熊攝政王見之詫甚以爲上賜也詰之知授自德豫親王王引咎因命諸王大臣會議擬罷多鐸輔政仍罰銀五千兩詔止罰銀二千兩○丁丑設六部漢尙書都察院漢左都御史各一以陳名夏爲吏部尙書謝啟光爲戶部尙書李若琳爲禮部尙書劉餘祐爲兵部尙書党崇雅爲刑部尙書金之俊爲工部尙書徐起元爲左都御史○贈四川死事參將王禹官廕○鄂爾多斯部單達等來貢○己丑調張鳳翔爲吏部左侍郎

轉趙京仕爲戶部左侍郎總督倉場以戴明說爲戶部右侍郎

由太

常寺卿遷轉劉昌爲工部左侍郎以李迎駿爲工部右侍郎

由侍郎管營繕司遷

轉房可壯爲刑部左侍郎以熊奮渭爲刑部右侍郎

由大理寺少卿遷

以

孫承澤爲兵部右侍郎

由大理寺卿遷

孫昌齡爲左副都御史

由太僕寺卿遷

○

庚寅浙江巡撫蕭起元奏擒獲衢州賊魁趙之超招撫臨安縣賊

渠高自生等千餘人○辛卯賜闡化王王舒克等貢使瑣諾木必

拉式號妙勝慧智灌頂國師錫之誥命並敕諭舒克等敕曰爾等

遣使進表具見真誠來服之意朕甚嘉悅方今天下一家雖遠方

異域亦不殊視念爾西域從來尊重佛教臣事中國已有成例其

故明所與誥敕印信若來進送朕卽改授一如舊例不易○壬辰

增天津等七衛東平一所管河千總各二

八月癸巳朔南贛巡撫劉武元奏江西逆賊金聲桓王得仁等擁

眾二十餘萬，冒犯賴界圍城。三月，官兵誓死決戰，殺賊萬餘，遺孽望風奔竄，重圍頓解。○天津巡撫李猶龍奏：土寇常元輔妄稱威武，王謀犯津東，總兵官蘇屏翰統兵往剿，元輔就擒。○乙未，喀爾喀部土謝圖汗碩雷汗等來貢。○己亥，保定巡撫于清廉奏：東明土賊僞稱天正年號，糾眾數十萬圍困縣城。總兵官魯國男會同滿兵併力剿殺，賊眾潰散。畿南甯謐。○浙閩總督陳錦奏：海逆鄭彩等連舩千餘，盤踞長樂連江等縣。總統部臣陳泰李率泰分兵夾擊，盡驅出海。長連二縣次第恢復。又統師直入興化，生擒賊渠僞總督顧世臣等十二人，斬之。興化蕩平。○壬寅，授投誠唐通左夢庚、鄭芝龍、董學禮、許定國、子爾安爲一等精奇尼哈番，劉良佐爲二等精奇尼哈番，劉澤清、李本深爲三等精奇尼哈番，張天福、劉進忠爲一等阿思哈尼哈番，張國柱爲二等阿思哈尼哈番，張

大元趙之龍李朝雲韓文鄭家棟劉麟圖許得功爲三等阿思哈

尼哈番餘授職有差○乙巳命英親王阿濟格同承澤郡王碩塞

貝勒尼堪貝子尙善公岳樂等領兵勦天津土寇○以胡世安爲

禮部左侍郎

由國史院學士遷

調高爾儼爲吏部右侍郎以陳之遴爲禮

部右侍郎

由秘書院侍讀學士遷

○以王顯祚爲陝西按察使管右布政使

事

由山西河東道參政遷

○丁未諭兵部今各處土賊偷製器械私買馬匹

毒害良民作爲叛亂朕思土賊之起不過兇愚數人迫脅村民遂

致貽禍不小今特爲禁約除任事文武官員及戰士外若閒散官

富民之家不許畜養馬匹亦不許收藏銃礮甲冑槍刀弓矢器械

各該地方官察出估值給價馬匹與軍士騎操甲冑槍刀弓矢器

械可用者收貯不可用者盡行銷毀鄰右十家長俱具甘結於該

管官彙造清冊送該督撫衙門轉送兵部有不遵禁諭隱匿兵器

者是懷叛逆作賊之心若經接獲或被首告本人處斬家產妻孥
入官鄰右十家長杖流出首告者賞給犯人家產三分之一賞例
止限百兩如挾仇誣陷卽以前罪反坐若鄰右十家長出首罪止
本犯竄驢任民間畜養若習武生童及武鄉試止許馬一騎弓一
張披子箭九枝勿用梅鉞箭若馬匹弓矢私借與人事發者其罪
維均地方官詳察姓名及馬毛齒弓箭數目造冊送該督撫衙門
存案凡各地方督撫道府州縣等官嚴限查收著兵部量各直省
道里遠近限定日期速行傳知○己酉以王一品爲兵部左侍郎
兼右副都御史巡撫鳳陽由吏部侍郎遷○庚戌偏沅巡撫線縉奏劾前
撫臣高斗光向帶劣弁宋奇英魏思德等擅用催餉旗號騙詐商
民又代賊至漢口偵探我軍消息叛情顯露今已密擒請嚴加究
治得旨高斗光著革職督撫按究擬具奏○辛亥諭戶部等衙門

京城漢官漢民原與滿洲共處近聞爭端日起劫殺搶奪而滿漢人等彼此推諉竟無已時似此何日清甯此實參居雜處之所致也朕反復思維遷移雖勞一時然滿漢各安不相擾害實爲永便除八旗投充漢人不令遷移外凡漢官及商民人等盡徙南城居住其原房或拆去另蓋或買賣取價各從其便朕重念遷徙累民著戶工二部詳察房屋間數每間給銀四兩此銀不可發與該管官員人等給散令各親身赴戶部衙門當堂領取務使遷徙之人得蒙實惠六部都察院翰林院順天府及大小各衙門書辦吏役人等若係看守倉庫原住衙門內者勿動另住者卽行搬移若俗人入廟焚香往來日間不禁不許畱宿過夜如有違犯其該寺廟僧道量事輕重問罪著禮部詳細稽查凡應遷徙之人先給賞銀聽其擇便定限來歲終搬盡著該部傳諭通知○壬子諭禮部

方今天下一家滿漢官民皆朕臣子欲其各相親睦莫若締結婚

姻自後滿漢官民有欲聯姻好者聽之○乙卯以夏玉爲兵部左

侍郎兼右副都御史巡撫天津

由左副都御史遷

張學聖爲右僉都御史

巡撫福建

由浙江督糧道參議遷

○改各省都司印文曰某省都司之印某

省行都司之印去都指揮使名色○丙辰喀爾喀部碩雷汗來貢

○戊午定諸王及官民嫁娶禮○庚申諭戶部朕欲滿漢官民共

相輯睦令其互結婚姻前已有旨嗣後凡滿洲官員之女欲與漢

人爲婚者先須呈明爾部查其應具奏者卽與具奏應自理者卽

行自理其無職人等之女部冊有名者令各牛条章京報部方嫁

無名者聽各牛条章京自行遣嫁至漢官之女欲與滿洲爲婚者

亦行報部無職者聽其自便不必報部其滿洲官民娶漢人之女

實係爲妻者方准其娶○辛酉蘇尼特部騰機特等來朝○天津

巡撫李猶龍戶部侍郎王公弼坐假招撫爲名赴賊營會飲革職

九月壬戌朔喀爾喀部邁達理胡土克圖等來貢○江西巡撫王

志佐奏僞巡撫吳江僞兵部尙書余應桂等久聚南康湖口黨惡

助逆遣遊擊李文玉進剿江等就擒命斬之○癸亥以蔡士英爲

左副都御史

由左僉都御史遷

○甲子命英親王阿濟格率兵剿曹縣土

寇○丙寅諭兵部投充滿洲新人所有馬匹兵器令各主察收如

投充漢人中有鐵匠弓箭匠不許私造兵器賣與漢人違者治罪

○札魯特部貝勒桑阿爾等來朝○己巳封貝勒勒克德渾爲多

羅順承郡王博洛爲多羅端重郡王○庚午諭內三院今纂修明

史闕天啟四年七年實錄及崇禎元年以後事蹟著在內六部都

察院衙門在外督撫鎮按及都布按三司等衙門將所闕年分內

一應上下文移有關政事者作速開送禮部彙送內院以備纂修

○壬申命鄭親王濟爾哈朗爲定遠大將軍統兵討湖廣逆賊李錦馬進忠○癸酉 上獵於近郊○甲戌貝子屯齊喀坐訐告鄭

親王後復私餽以鷹馬降爲鎮國公仍奪所屬一牛衆罰銀二千

兩○丁丑 上還宮○封貝勒尼堪爲多羅敬謹郡王○轉戴明

說爲戶部左侍郎以梁雲構爲戶部右侍郎由大理寺卿遷○以蘇尼特

部故郡王騰機思弟騰機特襲封○戊寅增浙江杭州城守副將

一兵二千名移衢州總兵於金華○己卯增八旗閒散章京滿洲

每旗七蒙古每旗三秩五品○庚辰轉蘇宏祖爲陝西左布政使

由山東右布政使轉○辛巳喀爾喀部扎薩克圖汗來貢○丙戌以盧震陽

爲山東右布政使由陝西潼關道參政遷○己丑孔有德等班師

冬十月乙未陝西按察使鄭清坐承問犯官不依律問罪降調○

丁酉定遠大將軍鄭親王濟爾哈朗奏大兵復曹縣斬獲無算生

擒賊首李名讓張學允等訊其作亂之由皆云劉澤清曾致書李化鯨鼓惑賊眾倡謀舉事許以內應將化鯨等一併解京事下所司○戊戌以正黃旗漢軍精奇尼哈番左夢庚正紅旗漢軍梅勒章京王國光各爲本旗固山額真○以周國佐爲吏部侍郎盧登科爲工部侍郎俱由吏部理事官遷○設駐防滄州城守尉一防禦三驍騎校四濟甯州城守尉一防禦三驍騎校四淮安府城守尉一防禦七驍騎校八濟南府城守尉一防禦三驍騎校四臨清州城守尉一防禦三驍騎校四大名府城守尉一防禦三驍騎校四河間府城守尉一防禦三驍騎校四○壬寅和碩禮親王代善薨年六十六○偏沅巡撫線縉奏定南將軍固山額真修圖賴復寶慶○定賜諸王以下修造原瑩銀兩例親王五千兩郡王三千兩貝勒二千兩貝子一千兩公五百兩和碩禮親王與眾不同特恩賜銀一

萬兩○辛亥宣府赤城兵叛命護軍統領阿爾津等率兵討之○

丙辰以黃紀爲陝西按察使

由靖遠道參政遷

○劉澤清勾連曹縣叛賊

謀爲不軌事覺澤清並弟姪及賊渠李洪基李化鯨皆伏誅○戊

午山東按察使武延祚以病致仕

十一月癸亥貝子蘇布圖隨征湖廣薨於軍諡悼愍○甲子諭吏

部等衙門督撫總兵受封疆重寄惟久任乃能成功不得以細故

輕更致誤地方至道府州縣一應滿漢官員必三年考滿方許升

遷各州縣城池偶有失事本管知府原無兵馬責任若概從降調

去畱不常益誤地方不係同城者不必議罪其該道不係同城亦

止住俸催勦視賊之勦滅遲速聽督撫按特奏分別以定開復降

罰教官原無地方責任不得同州縣官議罪○江南江西河南總

督馬國柱奏廣賊李成棟妄稱惠國公始踞南雄繼而勾連峒蠻

土寇號稱百萬直犯贛城撫臣劉武元總兵官胡有陞等大敗之
成棟單騎走斬首萬餘級俘獲無算得旨褒獎從優敘賚○丙寅
陝西巡撫黃爾性奏逆賊賀珍等謀欲渡江截漕興安總兵官任
珍擊走之生擒賊渠李應全等斬獲無算下所司察敘○戊辰冬
至祀 天於圓丘奉 太祖武皇帝配享 太祖以上四世 高
祖澤王爲肇祖原皇帝 高祖妣爲原皇后 曾祖慶王爲興祖
直皇帝 曾祖妣爲直皇后 祖昌王爲景祖翼皇帝 祖妣爲
翼皇后 考福王爲顯祖宣皇帝 妣爲宣皇后 上詣 太廟
致祭上冊寶○喀爾喀部扎薩克圖汗下額爾德尼哈談巴圖魯
厄魯特部諾門汗等來貢○辛未以奉 太祖武皇帝配 天及
追上 列祖尊號禮成御殿受朝賀大赦天下○詔曰叔父攝政
王治安天下有大勲勞宜增加殊禮以崇功德及妃世子應得封

號部院諸大臣集議具奏○丙子輔國公恭安卒恭安貝勒阿敏第四子阿敏得罪幽繫恭安以未分家子連坐廢爲庶人後念係宗室復封爲輔國公隨鄭親王濟爾哈朗征湖廣卒於軍年二十六○癸未攝政王獵至蹇家莊會報喀爾喀部二楚虎爾行獵向我邊界於是集諸王大臣議遣英親王阿濟格端重郡王博洛承澤郡王碩塞貝子拜尹圖公傅勒赫岳樂護軍統領鰲拜巴圖魯等統兵戍大同○庚寅設延綏鎮中協副將一駐紫波羅堡額兵一千名

十二月辛卯朔命郡王瓦克達貝子尙善屯齊公扎喀納韓岱等率兵赴英親王軍○調八旗游牧蒙古官兵之半戍阿爾齊土蘇門哈達○丁酉設八旗管領步兵每旗步軍副尉一每甲喇步軍校一每牛录步兵十兵內撥什庫一管守街宿城諸事○以馬光

先爲山東按察使

由阿達哈哈番遷

○戊戌英親王阿濟格等奏十二月

初三日大同總督司道知府各官出城驗草大同總兵官姜瓖閉門叛其收驗糧草之鍾古等俱被陷總督奔陽和臣隨統兵星夜前往於初四日圍其城請發紅衣砲以爲攻城之用○庚子諭姜瓖曰前因有事北方蒙古故命英王至大同與爾等全無干涉若爾有罪安用此詭計爲天下主儻舉動如此其誰信之此必有奸人煽惑離間爾等今爾如悔罪歸誠仍宥其過愆照舊恩養○辛丑攝政王獵至岔道復遣梅勒章京阿喇善侍郎噶達渾率兵赴英親王阿濟格軍其餘貝子公等及各官兵悉統以還○丁未贈死事英山縣知縣史良植官廕○戊申科爾沁貝勒張繼倫等來貢○辛亥南贛巡撫劉武元奏副將劉伯祿等攻破魚骨等寨擒斬僞軍門劉志諭並僞副將參將遊擊等二十餘名參將栗養志

等攻破蓮花等寨俘其僞滋陽王妃孔氏並擒斬僞都督葉南枝等遊擊鮑虎等又大敗賊兵於土橋擒斬僞軍門劉飛等下所司察敘○壬子江南江西河南總督馬國柱奏副將楊捷等復都昌生擒賊渠僞兵部尙書余應桂命斬之○甲寅大學士宋權請終母制得旨內院機務繁重著照舊入直私居持服以全忠孝○乙卯諭內三院前戶部奏在外大小文武各衙門額設公費等項允濫累民酌議裁減已經允行今思各衙門公費款項裁減未免用度不足反致害民著戶部另爲酌議速奏○革宣大總督耿焞職下法司議罪以姜瓖叛故也○丁巳以修養量爲兵部左侍郎兼右副都御史總督宣大山西由山東沂州總兵官遷○是歲行鹽三百七十八萬九千七百六十一引徵課銀一百八十五萬四百六十兩有奇鑄錢十四萬四千九百四十九萬四千二百有奇

東華錄

順治十二

臣王先謙敬編

臣周瀚蕃恭校

順治六年己丑春正月庚申朔 上避痘免朝賀○朝鮮來貢○

壬戌浙閩總督陳錦奏福州總兵張應夢復羅源縣右路總兵馬
得功復永春德化二縣擒僞總師顏昌儒等平三百餘寨○癸亥

命敬謹郡王尼堪同鎮國公喀爾楚渾輔國公穆爾祜等率師征

太原○遣大學士剛林傳諭朝鮮國使臣曰朝鮮一年一朝原定

閣臣一員尙書一員書狀官一員共三員代覲今念爾國閣臣尙

書垂白衰老者頗多且道路遙遠此後或閣臣尙書一員侍郎一

員令其代覲書狀官仍舊○乙丑江南江西河南總督馬國柱奏

舟山僞僉都嚴我公率知府許琬等投誠兼獻進剿機宜願充鄉

導下兵部議○丁卯纂修 太宗文皇帝實錄○山西巡按劉漪
奏賊渠劉遷劉豹等陷甯武偏關○戊辰諭兵部朕欲天下臣民
共享太平日夕圖維罔敢怠忽往年流賊作亂官民人等受其屠
戮慘禍已極是以命將興兵入關剿賊出斯民於水火登赤子於
衽席凡我臣庶已無不輸誠歸命矣孰意邇年以來多有不軌之
徒捏作洗民訛言煽惑愚眾以致無知之民輕信惶惑逃散作亂
者往往有之夫君民一體上下交孚則治臻上理若愚民疑心未
釋天下何時太平朕聞不嗜殺人者能一天下書云眾非元后何
戴后非眾罔與守邦君父也民子也父殘其子情理之所必無況
誅戮以懲有罪豈有無故殺人之理自元年以來洗民謠言無時
不有今將六年矣無故而屠戮者爲誰民肯從此回想疑必冰釋
朕又思滿漢語言雖異心性自同世閒絕無安居樂業之人自好

爲賊而願就死地者必有所迫以致此也意者督撫鎮按不得其人歟有司朘削魚肉民難自存歟蠲免賦稅有名無實歟茲特數事料不止此今嚴飭內外大小各官確議除弊興利之長策朕次第酌行之爾部卽通行告示仍著各撫按刊刻曉諭務使天下人民各安生理共樂昇平以副朕撫綏愛養之至意○諭戶部邇聞各省賣濫人役地方官民商賈甚受擾害爾部可傳諭永行禁止不得仍前遣往各省發賣止許在京均平市易永爲定制違者治罪不宥其採濫人丁併行酌減○贈山東死事濟甯道僉事李峕官廕○己巳阿霸垓烏朱穆秦土默特部來貢○辛未保定巡撫于清廉奏驛遞困敝已極請視差緩急量行裁汰餼養改歸縣令應付仍屬驛丞庶驛政永清公事無誤得旨驛傳原備軍國重務豈容繁差致困著遵照經制應付有濫給牌票及例外多索者許

該地方官參奏治罪○山西巡撫祝世昌奏姜瓖叛黨姚舉等率眾猖獗攻城掠堡冀甯道王昌齡運餉至平原驛爲舉所殺又犯忻州知州劉德炎迎降固山額真庫魯克達爾漢阿賴等破賊於石嶺關賊退據忻州復進偪之先後斬首二千餘級獲甲冑馬匹甚眾賊棄城遁追至上陽武因路險而止○壬申四川巡撫李國英奏僞逆李廷明犯劍州章京項友功黃世仁等往剿至毛蛇溝板橋壩等處賊逆戰奮擊大破之追殺二十餘里生擒僞將三員斬首二百餘級○癸酉封蘇尼特部騰機思子台吉撒瑪查爲貝勒○乙亥諭戶部設關徵稅原寓議察奸宄之意非專與商賈較錙銖也爾部行文各關滿漢官員以後俱照原定則例起稅如有徇情權貴放免船隻仍於商船增收或希充私橐例外多徵以病商民者一經查出定行重處○丙子定內三院官制每院設學士

一侍讀學士一侍講學士一侍讀一侍講一著爲例○丁丑偏沅巡撫線縉坐聞警離汎削職逮問○戊寅大學士洪承疇奏平治天下之道在於各省督撫總兵俱得其人然人才難得知人亦不易舊時會推原有成例正爲一人見聞有限必合眾論乃爲無私今欲用得其人宜實行保舉連坐之法如督撫總兵員缺令吏兵二部滿漢堂官詳加評註自書姓名保舉再以咨詢左右大臣議論相合方行點用俟後有功效保舉者受薦賢之賞若曠職債事保舉者受妄昧之罪庶封疆民生兩有攸賴得旨以後用督撫提鎮著內院九卿會推若有獨知灼見情願保舉者許自得保舉得人者升賞誤舉者連坐○己卯諭關外遼人有先年入關在各省居住者離墳墓別鄉井歷年已久殊可憫念著出示曉諭凡係遼人各寫籍貫姓名赴戶部投遞聽候察收有願入滿洲旗內者卽

入旗內欲依親戚居住者聽歸親戚內有通曉文理堪任民牧者准送禮部考選有素善騎射堪爲將領者准送兵部試用人材壯健願入行伍者給與糧餉照滿洲一例恩養其有願還故鄉者聽若安土重遷不願來京報名者亦從其便○厄魯特部阿巴賴諾顏等來貢○庚辰御史張煊奏督撫有司朘削百姓小民無由申懇言官既有所聞自當參奏使言之而當固可立見施行卽或偶有過當亦宜稍示優容免其對理則言官歡忻鼓舞知無不言言無不盡得旨以後言官論人善惡雖有不實不得徑送刑部必命廷臣公同議擬如果挾讐誣陷革職下刑部治罪○山東巡撫呂逢春奏土賊攻商河縣官兵追敗之於德平斬賊渠徐壽頭及賊首八百餘級餘眾大潰○辛巳諭戶部凡諸王貝勒貝子公宗室等採獲人丁若於額外多遣者其所遣之人入官如官員人民私

行採取者採取人亦入官伊主治以重罪仍著於山海關設人稽

察○以金廷獻爲右僉都御史巡撫偏沅

由御史遷

○壬午征南大將

軍固山額眞譚泰固山額眞何洛會等奏官兵於去年七月初十

日薄南昌府城下圍困賊兵至本年正月十八日固山額眞何洛

會領護軍參領喀爾他喇署甲喇章京根特巴圖魯至城南豎雲

梯進攻十九日午後蒙古固山兵先登叛賊金聲桓中二矢投水

死仍磔屍示眾生擒王得仁正法賊黨盡殲南昌九江南康瑞州

臨江袁州等府俱平下兵部察敘○開福建鼓鑄○癸未平西大

將軍英親王阿濟格奏賊黨劉遷攻代州據其外關章京艾松古

遊擊高國勝並蒙古三百人俱被困臣隨遣端重郡王博洛承澤

郡王碩塞等率兵往援豎梯攻外關蒙魁等相繼先登大破之斬

賊渠郎芳劉遷潛遁代州圍解○乙酉山東巡撫呂逢春奏土賊

杜全張文齊等分據村落築城濬壕勢甚猖獗臨清總兵宜永貴同滿洲大兵往剿毀其巢穴斬全文齊並賊首二千餘級○丙戌四川巡撫李國英奏叛將王基城舊部林時泰等前殺基城來降臣是以待之不疑令分防中江潼川射洪等處時泰等屢次乞糧臣以非額設未給遂據城譟叛殺死射洪知縣楊于朝臣遣副將曹純忠遊擊惠成傑等分兵攻剿斬獲無算時泰等俱潰遁得旨林時泰著嚴行剿捕毋致逋誅

二月辛卯兵部以總兵官任珍陣獲僞官兵四十九名俱撫養不殺奏聞得旨凡平定地方降者撫之以示恩抗者殺之以示懲如此則人皆感恩畏死求生而來歸矣今平西王等將陣獲之人撫而不殺以爲敵聞之必曰抗者被獲尙加撫養我等若降亦將撫我蓋冀其不抗而來歸也殊不知敵人見抗者亦撫降者亦撫是

抗拒者亦不誅也有戰而已誰肯先降此事甚不合理爾部其移
咨平西王吳三桂壘爾根侍衛李國翰知之○癸巳喀爾喀部碩
雷汗下碩克推邵尙塔布囊等來歸○甲午命大學士范文程剛
林祁充格洪承疇甯完我宋權學士王文奎爲會試主考官○癸
卯命攝政王多爾袞統兵征大同○免直隸六年以前荒田稅糧
四川商民鹽課○己酉攝政王多爾袞師次古兒班口有喀爾喀
碩雷汗下七人攜妻子來歸言碩雷汗兵馬距我國有十日程散
處於野王因止大同之行議出張家口趨喀爾喀遣人調外藩蒙
古兵○辛亥平西王吳三桂等奏僞王朱森釜僞定遠侯趙榮貴
率賊萬餘犯階州臣等前後分擊殺賊七千有餘陣斬森釜榮貴
獲僞侯印一顆僞總兵印十顆及馬贏金銀等物下所司議敘○
壬子攝政王多爾袞師次察喜兒土察罕腦兒以軍中馬瘠且蒙

古道路無水遂罷往喀爾喀轉趨大同遣人止外藩蒙古兵○丙辰山東巡撫呂逢春奏長清縣知縣呂朝輔率官兵擊寇孫化庭化庭勢窮遂獻僞翼王朱議泐軍師宗岱並僞印僞敕命將朱議泐宗岱正法呂朝輔等下所司察敘○丁巳福建右布政使趙林翹以老病休致○戊午漢羌總兵尤可望坐冒餉科罰聞警規避妄殺兵丁擅造龍旗窩藏僞官姦淫良婦棄市甯夏巡撫胡全才坐濫給劄付刑斃證佐褫職○川湖總督羅繡錦奏辰常總兵官馬蛟麟剿張逆於黃茅田大破之

三月癸亥攝政王多爾袞拔渾源州○甲子改蘭州營參將爲副將○乙丑攝政王師次寇家寨定西大將軍敬謹郡王尼堪啟報固山額真庫魯克達爾漢阿賴等屢次戰勝斬僞巡撫姜輝兵馬無算僞參將羅英壇獻印劄率所部四百人降○淮揚巡按張漢

奏土賊陷海州知州張懋勳州同李士麟所官胡崇禮百總李奕
蔭死之○丙寅陝西巡撫盧傳奏漢羌總兵官張天福剿平逆賊
覃一涵擒僞山陰王等斬馘殆盡下部察敘○直順巡按蘇京奏
賊破鉅鹿署縣事廣平府照磨周維翰等死之○丁卯陝西巡撫
黃爾性奏逆賊王永強陷延安榆林等十九州縣延綏巡撫王正
志靖遠道夏時芳死之宜君縣知縣賈士璋闔門自縊總兵官沈
朝華中部縣知縣許襄遁鄜州道王希舜延安府知府宋從心鄜
州知州李方徵被執羈禁榆林道孫士甯洛川縣知縣左射斗從
逆受職○己巳應州從賊參將張祖壽山陰縣從賊知縣顏永錫
各率軍民人等出城詣攝政王降○是日吏部啟心郎甯古里以
輔政德豫親王多鐸出痘往啟攝政王王卽日旋師○辛未攝政
王旋師至大同遣人薄城諭之曰渾源負固不服予已克平應州

山陰悉已效順予今來此爾姜瓖速開門迎降予當爾宥儻今招爾不降迫勢迫之後雖欲求順亦不汝從予豈有旣圍而復縱者乎與其自取死亡不如速來歸順諭畢守陴者以其言告瓖瓖遣人來言曰王果至可將詔書來王因頒諭與來人諭曰爾等邠爲逆謀諒必有所困迫因而肆亂決無自取禍敗之理大同闔城百姓悉吾赤子儻必不爾貸則株連非少向使他人至此爾或顧畏不從予茲躬臨可歡然來順如來歸順庶闔城獲甦予方欲天下之人戴吾恩德爾姜瓖諸罪悉與赦免諭到可卽出降自恩養如故勿更懷疑慮以貽害闔城官民也予來爾不歸順則再無生路矣予言一出脫有反覆天下之人誰復信之瓖得諭旋具啟報云征西將軍臣姜瓖謹啟臣自甲申年五月閒聞攝政王駕入燕京不遠千里率領邊塞兵民歸附清朝其首降功績已久在睿鑒中

五年以來殫心畢力統眾彈壓未有毫髮罪過臣可謂克盡厥職矣但上不推誠以待不惟臣一人未蒙升賞而效忠歸順之民亦阡危已極且選出各官又肆行陵虐民益難堪頃者英王師至催辦糧草紳士軍民苦不可當動輒欲行殺戮臣與大同一方百姓委屬無辜誰肯坐而受死似此苦楚雖神明如我攝政王何由得知使各官誠能體上意奉上法潔己安民則尺一所至三晉三秦必且亂萌頓消矣其如大同兵民忿怨不勝脅臣起事何不然臣母年將入旬臣子尙在襁褓何忍輕身家而陷此冒罪於我攝政王乎臣與諸將士兵民無窮苦衷正欲伸懇於王前幸駕俯臨父母孔邇安敢背逆但眾心反側不肯輕放臣出耳況闔城之人誓死王縱開誠肆赦誰敢據信是惟更降一諭明指以全活之方若不開恩臣惟率眾以俟無他想望矣王如果有別諭幸遣使來示

於御河橋上臣將敬受之王覽啟怒甚會英親王兩福金俱出痘薨攝政王令英親王先歸英王啟云王躬攝大政正在爲國不遑之際若不乘此效力更於何時今余不復希冀富貴但以丈夫重名譽欲佐命效力俾後世垂名史冊耳以妻死之故棄大事而歸有是理乎攝政王嘉之贈以鞍轡名馬二匹○進封承澤郡王碩塞端重郡王博洛敬謹郡王尼堪俱爲親王諭曰爾等向不在寵貴之列以同係 太祖孫加錫王爵至於位次俸祿則不得與大藩等○陝西巡撫黃爾性奏逆賊王永強破同官縣定邊花馬池軍民相繼作亂○壬申江西巡撫朱延慶奏廣信府知府楊國楨參將康時昇等練兵措餉復玉山等縣下部察敘○甯夏巡撫李鑑奏官兵攻克臨河等堡斬獲無算○甲戌川湖總督羅繡錦奏總兵官馬蛟麟陣擒賊渠舒有朝等下部察敘○甯夏巡撫李鑑

奏叛夷扎穆素奔據賀蘭山控求通市不允仍令設計捕殛○乙亥陝西總督孟喬芳奏甘涼逆回米喇印丁國棟乘調兵征川倡謀作亂變起倉卒甘肅巡撫張文衡西甯道副使林維造參議張鵬翼甘肅總兵官劉良臣涼州副將毛鎮肅州副將潘雲騰遊擊黃得成金卽都司王之儁守備胡大年李廷試李承澤陳九功俱被執殉難莊浪參將翟大有赴敵戰歿涼州同知徐自礪參將蔣國泰從逆受職○丁丑輔政德豫親王多鐸薨年三十六○攝政王師次居庸關蘇克薩哈等以輔政德豫親王多鐸訃至王去纓易素帶泣是日暮馳入京城臨喪德豫親王二福金請殉攝政王再三慰解請益力遂許之○陝西巡撫黃爾性奏總兵官任珍追剿賀賊斬首甚多陣獲人畜器械無算下部察敘○戊寅浙閩總督陳錦奏福清等二十縣士民同心效死守城忠義可嘉請免本

年丁徭以示鼓勵奏下部議○辛巳江南江西河南總督馬國柱奏楚賊突犯霍山把總韓明秀守備徐志高赴敵死之○甲申諭兵部曩因民間有火礮甲冑弓箭刀槍馬匹慮爲賊資戕害小民故行禁止近聞民無兵器不能禦侮賊反得利良民受其荼毒今思礮與甲冑兩者原非民間宜有仍照舊嚴禁其三眼槍鳥槍弓箭刀槍馬匹等項悉聽民間存留不得禁止其先已交官者給還原主○諭兵部向來申嚴隱匿之法原以滿洲官兵身經百戰或有因父戰歿而以所俘賞其子者或有因兄戰歿而以所俘賞其弟者或有親身捨死戰獲者今俱逃盡滿洲官兵紛紛控奏其言亦自有理故先令有隱匿逃人者斬其鄰右及十家長百家長不行舉首地方官不能覺察者俱爲連坐今再四思維逃人雖係滿洲官兵攻苦所獲而前令未免過重自今以後若隱匿逃人被入

告發或本主認得隱匿逃人者免死流徙其左右兩鄰各責三十板十家長責二十板地方官俟計察時併議若善爲覺察者亦俟計察時議敘逃人自歸其主或隱匿者自行送出一概免罪有親戚願贖回者各聽其便○征南大將軍固山額真譚泰何洛會等奏大兵至南安偵逆賊李成棟竊據信豐僞克國公竊據南康遣兵先破僞克國公殲除殆盡繼抵信豐前後合圍逃出之人報云賊謀夜遁梅勒章京覺善等遂豎梯攻克其城賊潰散渡河署梅勒章京宜爾格德等督兵追剿李成棟溺水死隨令護軍統領伊爾德等平定撫州建昌兩府復破僞總兵楊奇盛兵二千有奇擒斬渠魁撲滅餘孽江西悉平下所司議敘○丙戌端重親王博洛等奏祖馬路得勝路賊兵五千餘由大同北山出立二營來徧我軍護軍統領鰲拜巴圖昂邦章京阿喇納等破一營梅勒章京譚

布護軍統領車爾布破一營姜瓖聞兩路賊破遂率賊千餘騎出城應援臣親督鰲拜等奮勇進剿斬賊殆盡○平西王吳三桂等奏大兵抵秦克復宜君同官二縣擊敗逆賊王永強等斬首七千餘級獲駝馬四百五十餘匹下部察敘○丁亥陝西巡撫黃爾性奏遊擊盛嘉寶陣擒賊首薛命新等十人斬三百餘級

夏四月庚寅遣羅碩卦喇駐防太原○癸巳定西大將軍英親王阿濟格奏恢復左衛○乙未命貝子吳達海鎮國公屯齊喀輔國公巴布泰等帥師往大同更代英親王阿濟格等兵馬○丙申陝西巡撫黃爾性奏平西王吳三桂等克蒲縣誅逆寇王永強所設僞官餘黨悉平○戊戌戶部奏故明漕運官員皆係世職今世職已裁各衛雖設有衛守備千總然遷轉不常無相統之義且多屬委用故不自愛致挂欠數多茲應就漕運各衛中擇素有才幹者

加以千總之職責其押運量功升轉如有挂欠治罪追賠庶責成專而勸懲明從之○己亥諭平西王吳三桂固山額真墨爾根侍衛李國翰曰王等忠勇智畧與諸將士同心擊賊擒獲僞官大獲全勝深可嘉悅其益勵壯猷務獲渠魁以定疆圉王與固山額真今後但發縱指示不必身先士卒可也○庚子殿試天下貢士左敬祖等制策曰從古帝王以天下爲一家朕自入中原以來滿漢會無異視而遠邇百姓猶未同風豈滿人尙質漢人尙文習俗或不同歟音語未通意見偶殊畛域或未化歟今欲聯滿漢爲一體使之同心合力歡然無閒何道而可民爲邦本食爲民天自兵興以來地荒民逃賦稅不充今欲休養生惠使之復業力農民足國裕何道而可邇來頑民梗化不軌時逞若徒加以兵恐波累無辜大傷好生之意若不加以兵則荼毒良民孰是底定之期今欲使

之革心向化盜息民安一勞永定又何道而可爾多士經術濟世
直陳無隱務期要言可行不用四六舊套朕將親覽焉○增戶部
十四司漢主事各一○壬寅開浙江山東鼓鑄○癸卯福建巡按
霍達奏官兵復平和詔安漳平甯洋四縣○甲辰賜劉子壯等三
百九十五人進士及第出身有差○乙巳 孝端皇太后崩親王
以下拜他喇布勒哈番以上公主和碩妃以下正黃鑲黃二旗拜
他喇布勒哈番三等侍衛命婦以上六旗阿達哈哈番命婦以上
各照翼齊集 上率諸王以下文武各官及王妃以下官員命婦
俱成服一切典儀隆備享祭豐腆悉遵定制與 文皇帝喪禮同
自初喪以至百日 上率諸王文武大臣行奠獻禮皆盡敬盡哀
云○丁未給事中姚文然奏臣讀制策首以滿漢同心合力爲念
竊思滿漢一家咸思報 主止因語言文字間隔難通未免彼此

有異同之見前此兩科館選雖有清書但選員無多故未有加授別衙門者臣請於新進士內廣選庶吉士察其品行端方年力強壯者俾肄習清書精熟授以科道等官內而召對可省轉譯之煩卽出而巡方亦便與滿洲鎮撫諸臣言語相通可收同寅協恭之效奏下所司○壬子諭內三院自兵興以來地多荒蕪民多逃亡流離無告深可憫惻著戶部都察院傳諭各撫按轉行道府州縣有司凡各處逃亡民人不論原籍別籍必廣加招徠編入保甲俾之安居樂業察本地方無主荒田州縣官給以印信執照開墾耕種永准爲業俟耕至六年之後有司官親察成熟畝數撫按勘實奏請奉旨方議徵收錢糧其六年以前不許開徵不許分毫僉派差徭如縱容衙役鄉約甲長借端科害州縣印官無所辭罪務使逃民復業田地墾闢漸多各州縣以招民勸耕之多寡爲優劣道

府以責成催督之勤情爲殿最每歲終撫按分別具奏載入考成
該部院速頒示遵行○癸丑以董宗聖爲左副都御史巡撫延綏
由山東左布政使遷○浙江左布政使王敬錫坐貪婪褫職○浙閩總督陳
錦奏官兵平福甯福安縣○靖南將軍陳泰等奏福建二府一州
二十九縣先爲賊踞臣等領兵剿殺俱已恢復安設官兵全閩底
定得旨據奏官兵大捷福建全省已定陳泰等盡心調度克奏膚
功深可嘉悅在事有功人員察明議敘○乙卯寇陷山西汾州府
命端重親王博洛爲定西大將軍由大同統官兵往討之命敬謹
親王尼堪由左衛往圍大同○攝政王諭姜瓖曰子前此所以親
至大同者蓋念爾爲大臣投誠有素一旦遽變必有其由更念閩
城官紳軍民俱罹屠戮之慘誠有不忍耳方謂赦令一到便能悔
悟前非出城待罪及閱來啟語多悖謬故不復降諭今英王爲爾

懇請云有悔過歸誠之意予復憫念闔城生靈不忍終置死地故復降此赦宥之諭爾宜速爲悔悟率眾來歸從前罪犯悉與赦免明諭已出決無反覆之理不然將何以取信於天下乎若復狐疑不決則自誤且以誤眾矣宜熟思之○丙辰喀爾喀部土謝圖汗等來貢○丁巳封貝子滿達海爲和碩親王

五月辛酉遣屠賴率師赴太原軍○癸亥以哈喇庫爲副都御史

由禮部副理事官選

○丁卯轉盧震陽爲山東左布政使

由右布政使轉

以丁文盛

爲福建左布政使

由河南按察使遷

周亮工爲福建右布政使

由按察使遷

○

己巳以河工告竣加河道總督楊方興兵部尙書河南巡撫吳景道兵部右侍郎銜○辛未多羅郡王精濟鼐年六歲○壬申諭兵部滿洲漢人俱屬吾民原無二視之理但邇來用兵亦出於不得已豈可苦累良民今後行軍不論多寡其領兵主將可嚴飭將士

等糧豆草束悉照部定之數支用不得分外多取其鍋席鋤刀馬槽等物須委幹員親自看驗酌量取用牧馬完日令各旗章京親驗照數發還仍約束兵丁民間之物毋許秋毫侵犯不時遣官稽察如有搶奪害民者卽時察出治以重罪該管者連坐並嚴飭各牛彘各撥什庫轉行所屬今後有搶漢人一物者卽行處斬家奴有犯罪及家長其牛彘章京撥什庫若不嚴爲曉諭一併治罪有帶弓箭軍器夥眾劫奪者不分首從悉行處斬爾部通行遠近地方城市鄉村徧張告示曉諭通知○癸酉朝鮮來貢○甲戌贈死事克西道副使王登孝拖沙喇哈番徐成名官廕○丙子以李棲鳳爲右僉都御史巡撫廣東由浙江嘉湖道參議遷郭肇基爲兵部左侍郎兼右副都御史巡撫廣西由三等阿達哈哈番遷○免山西太原平陽汾州三府遼澤二州水災額賦○初宣大總督耿焯因姜瓖謀叛不能

覺察降巡撫至是吏部以耿燁不堪復任巡撫請以左布政使用從之○丁丑改封恭順王孔有德爲定南王懷順王耿仲明爲靖南王智順王尙可喜爲平南王各授金冊金印賜孔有德冊文曰爾孔有德原係明臣見明國之氣運衰微遂起兵行元帥事蹂躪山東地方全攜所部將吏軍民航海來歸原給都元帥敕印於崇德元年四月二十七日優加冊印封恭順王俾功名富貴帶礪山河子孫世世承襲一切過犯盡皆原宥隨多羅克勤郡王取旅順口時爾帥所部兵協攻平定朝鮮國時爾率所部隨輔政叔德豫親王破其援兵和碩英親王取皮島時爾帥所部兵協攻圍困錦州及和碩鄭親王破洪承疇兵時爾帥所部兵交戰叔父攝政王取杏山時爾帥所部兵協攻和碩鄭親王取中後所前屯衛時爾率所部兵協攻叔父攝政王入山海關之日殺敗流賊二十萬爾

率所部兵交戰又追擊流賊至慶都縣爾率所部兵交戰輔政叔德豫親王領兵剿流賊滅福王平定河南江南在潼關殺流賊時爾率所部兵交戰取揚州時爾率所部兵協攻取江陰縣時爾率所部兵協攻又特命爾領兵進取湖南爾隨宜剿撫攻克郡邑招撫官吏兵民甚眾爾原封恭順王今授金冊金印加封爲定南王爾其益勵忠勤奉公守義以報特恩尙其欽哉勿負朕命賜耿仲明冊文曰爾耿仲明原係明臣因見明國之氣運衰微遂起兵行總兵事蹂躪山東地方全攜所部將吏軍民航海來歸原給總兵官敕印於崇德元年四月二十七日優加冊印封懷順王俾功名富貴帶礪山河子孫世世承襲一切過犯盡皆原宥隨多羅克勤郡王取旅順口時爾率所部兵協攻平定朝鮮國時爾率所部隨輔政叔德豫親王破其援兵和碩英親王取皮島時爾率所部兵

協攻叔父攝政王破洪承疇三營時爾率所部兵交戰叔父攝政王取塔山時爾率所部兵協攻和碩鄭親王取中後所前屯衛時爾率所部兵協攻叔父攝政王入山海關之日殺敗流賊二十萬爾率所部兵交戰又追擊流賊至慶都縣爾率所部兵交戰輔政叔德豫親王領兵剿流賊滅福王平定河南江南在潼關殺流賊時爾率所部兵交戰取揚州時爾率所部兵協攻又同恭順王進取湖南爾隨宜剿撫攻克郡邑招撫官吏兵民甚眾爾原係懷順王今授金冊金印加封爲靖南王爾其益勵忠勤奉公守義以報特恩尙其欽哉勿負朕命賜尙可喜冊文曰爾尙可喜原係明臣見明國之氣運衰微擒其所遣副將二員起兵取廣鹿等五島全攜所部將吏兵民航海來歸原給總兵官敕印於崇德元年四月二十七日優加冊印封智順王俾功名富貴帶礪山河子孫世世

承襲一切過犯盡皆原宥後征大同時爾於代州敗明步兵七百
平定朝鮮國時爾率所部隨輔政叔德豫親王破其援兵和碩英
親王取皮島時爾率所部兵協攻我兵在松山破洪承疇兵時爾
率所部兵交戰又隨和碩英親王在松山破曹總兵之兵叔父攝
政王取杏山時爾率所部兵交戰和碩鄭親王取中後所前屯衛
時爾率所部兵交戰叔父攝政王入山海關之日殺敗流賊二十
萬爾率所部兵交戰又追擊流賊至慶都縣爾率所部兵交戰和
碩英親王征流賊圍攻延安府爾率所部兵進戰又同恭順王進
取湖南爾隨宸剿撫攻克郡邑招撫官吏兵民甚眾爾原係智順
王今授金冊金印加封爲平南王爾其益勵忠勤奉公守義以報
特恩尙其欽哉勿負朕命○令定南王孔有德率舊兵三千一百
及新增兵一萬六千九百共二萬往剿廣西挾家駐防其全省巡

撫道府州縣各官並印信俱令攜往靖南王耿仲明率舊兵二千五百及新增兵七千五百平南王尙可喜率舊兵二千三百及新增兵七千七百共二萬往剿廣東挈家駐防其全省巡撫道府州縣各官並印信俱令攜往○裁直隸河間永平江南蘇州松江山東兗州東昌浙江湖州陝西鞏昌西甯肅州同知十直隸順天河閒江南鳳陽河南開封南陽汝甯歸德湖廣黃州岳州鄖陽安陸衡州江西南昌吉安袁州撫州饒州九江南安浙江杭州温州通判二十一○戊寅設定南王下隨征總兵官一左右翼總兵官各一靖南王平南王下左右總兵官各一每總兵下中軍旗鼓各一調廣西辰常總兵官右都督馬蛟麟爲定南王下隨征總兵官定南王下二等阿思哈尼哈番線國安爲左翼總兵官三等精奇尼哈番曹得先爲右翼總兵官靖南王下二等阿思哈尼哈番徐得

功爲左翼總兵官二等阿思哈尼哈番連得成爲右翼總兵官平

南王下一等阿思哈尼哈番許爾顯爲左翼總兵官三等阿思哈

尼哈番班志富爲右翼總兵官○改長沙總兵員缺爲副將○免

直隸寶坻順義二縣五年水災額賦○贈陣亡天津遊擊孔道興

官○辛巳陝西巡撫黃爾性奏平西王吳三桂固山額真墨爾根

侍衛李國翰進取延安府賊兵遠竄復其城下所司議敘○壬午

以盧六藝爲廣東左布政使楊名顯爲廣東右布政使曹國柄爲

廣東按察使俱由郎中遷○以胡章爲山東右布政使原任宣府總兵官○四

川巡撫李國英奏龍安邊郡悉平○癸未戶部等衙門奏我朝敷

政首重恤民定鼎以來罷去橫征與民休息但今邊疆未靖師旅

頻興一歲所入不足供一歲之出今議開監生吏典承差等援納

給內外僧道度牒准徒杖等罪折贖裁天津鳳陽安徽巡撫巡江

御史天津餉道等官以裕國家經費之用報可○乙酉喀爾喀部碩雷汗等來貢○征西大將軍端重親王博洛奏克復山西清源交城文水徐溝祁縣等處○丙戌諭鄂爾多斯部落扎穆蘇等聞爾背叛卽欲加兵但念爾受朕恩有年兼以生靈堪惜故不忍遽用干戈爾能悔過復還故土相率來朝卽宥爾等罪恩養如常儻不速改前非倚恃地方險要與察哈爾同惡不卽歸順入冬以後當發大兵窮爾蹤迹務期必獲豈容爾等背叛之人偷活耶況今天下中外咸仰朕恩傾心向化爾所稔知朕旣降恩綸必不復念舊惡特諭

六月戊戌定西大將軍端重親王博洛奏平衛二賊渠圍平陽遣梅勒章京譚布等擊敗之賊渡黃河遁平陽汾州平○庚子朝鮮國王妃趙氏奏國王李倬薨請冊封世子湔襲爵○辛丑轉張大

任爲湖廣左布政使

由河南右布政使轉

○贈死事金華府知府程瑾官廕

○壬寅英親王阿濟格遣吳拜羅璽啟攝政王曰輔政德豫親王征流寇至慶都而潛身於僻地破潼關西安而不盡殲其眾追騰機思而不取其國有何功績乃將其二子優異於眾鄭親王乃叔父之子子乃太祖之子皇上之叔何不以子爲叔王而以鄭親王爲叔王攝政王使吳拜等答曰德豫親王薨逝未久何忍遽出此言初令爾統大兵往陝西征討流寇後令德豫親王往征江南德豫親王破流寇克西安平定江南河南浙江追騰機思俘獲甚多敗喀爾喀二汗兵且叔王原爲親王爾原爲郡王其一子吾養爲子一子承襲王爵何爲優異耶鄭親王雖叔父子原係親王爾安得妄思越分自請爲叔王大不合理英王不悅更請營建府第於是攝政王令諸王貝勒大臣數其罪曰初令爾往征喀爾喀

溫布額爾德尼乃故往大同又擅加大同宣府文武官各一級私除各處職官違令攻渾源州又與郡王瓦克達交好數贈財物諸王大臣議削阿濟格王爵撤其所屬人員瓦克達坐以應得之罪並追所賄財物攝政王以英王特親冒請非他人摘發免其罪令以後勿預部務及交接漢官並宥瓦克達罪○諭諸王及諸大臣有干預各衙門政事及指摘內外漢官謂某賢能應升某劣應降者不論其言之是非卽行治罪今之內外各官應升遷者升遷應降處者降處豈如明季偏聽人言輕於進退或處或縱耶其騙取財物之人不過就中巧撞卽行賄之人亦不過枉費金錢而已至於各王有以衙門之事私行傳呼各衙門官至府者罪在王聽其傳呼而去者罪在各官遇有啟奏之事必奏明方許傳各衙門官其所傳官員亦必問明啟奏之人果係真實方許前往○丙午贈

死事理藩院副理事官圖魯西官○江南江西河南總督馬國柱奏南贛餘孽擁故明宗室朱由植作亂官兵討平之○壬子免直隸滄州清苑六年以前荒田額賦○癸丑封張真人五十二代孫應京爲正一嗣教大真人賜敕印○以王原撫爲四川布政使司參議管左布政使事由隨征中書舍人遷吳之茂爲四川布政使司參議管右布政使事由副楊道洵爲四川按察使司僉事管按察使事由選貢○乙卯免江西四年五年逋賦有差○丁巳攝政王多爾袞率師征大同集內三院及部院等衙門官諭曰爾等皆國之重臣宜各勤職掌予率師西行不日言旋予之行也非以諸王大臣不勝其任但恐行師之際擾及良民故爲親行予止至甯武關朔州便歸不遠行亦不久留也又諭固山額眞譚泰何洛會內大臣冷僧機大學士剛林范文程曰各部院事務令爾等裁決在部可結之

事仍令各部料理其軍國大事集英親王議政大臣固山額真公
同商議大事可緩者著候子還不可緩者卽行啟知